


সূরা আল্ মা'উন-১০৭ (হিজরতের পূর্বে অবতীর্ণ)

অবতরণকাল ও প্রসঙ্গ

এ সূরাটি মক্কায় অবতীর্ণ প্রাথমিক সূরাগুলোর অন্যতম। পূর্ববর্তী সূরাতে কুরায়শদের বলা হয়েছে, আল্লাহ্ তাআলা তাদেরকে নিরাপত্তা ও খাদ্য-দ্রব্যাদি সরবরাহ করে সুখ-স্বাচ্ছন্দ্য রেখেছেন। এটা এজন্য নয় যে তারা নিজেদের কাজ-কর্মের দ্বারা এ সুখ-স্বাচ্ছন্দ্য অর্জন করেছে এবং নিজেদেরকে এসব ঐশী অনুগ্রহ পাওয়ার যোগ্য প্রমাণ করেছে। বরং এটা ছিল তাদের উপর আল্লাহ্ তাআলার পক্ষ থেকে অর্থাৎ পরম করুণাময় অযাচিত-অসীম দানকারী ও বার বার কৃপাকারীর বিশেষ অনুগ্রহ। এ কারণে তাদেরকে বলা হলো, তাদের উচিত অতিশয় বিনয় ও কৃতজ্ঞতার সাথে তাদের দয়ালু প্রভু ও সৃষ্টার প্রতি ভক্তি-শ্রদ্ধা, প্রেম-ভালবাসা ও ধ্যান-উপাসনা নিবেদন করা। তা না করে তারা নিজেদেরকে একমাত্র পার্থিব বিষয়ে এবং মূর্তি-পূজায় লিপ্ত রেখেছে। এ সূরাতে বলা হয়েছে, যে ব্যক্তি বা জাতি নিজেদেরকে কেবল পার্থিব বিষয়াদিতেই লিপ্ত রাখে পরলোকের বিশ্বাস তাদের মন থেকে উঠে যায় এবং সৃষ্টিকর্তাকে তারা একেবারে ভুলে বসে। এ প্রসঙ্গে ইসলামের দুটি মূল-নীতির উল্লেখপূর্বক বলা হয়েছে, যারা আল্লাহ্র ইবাদত ও মানব-সেবা, এ দুটি কাজে অবহেলা করে তারা ধর্মকেই অস্বীকার করে। অর্থাৎ এ দুটি কাজ মনোযোগ দিয়ে না করা আর ধর্মকে অস্বীকার করা একই কথা।





সূরা আল্ মা'উন-১০৭

মক্কী সূরা, বিসমিল্লাহ্‌সহ ৮ আয়াত এবং ১ রুকু

১। *আল্লাহর নামে, যিনি পরম করুণাময়, অযাচিত-অসীম দানকারী (ও) বার বার কৃপাকারী।

بِسْمِ اللَّهِ الرَّحْمَنِ الرَّحِيمِ ①

২। তুমি কি তাকে লক্ষ্য করেছ, যে *ধর্মকে প্রত্যাখ্যান করে^{৩৪৩}?

أَرَأَيْتَ الَّذِي يُكَذِّبُ بِالذِّينِ ①

৩। এ সেই ব্যক্তি, যে এতীমকে তাড়িয়ে দেয়^{৩৪৪}

فَذَلِكَ الَّذِي يَدُعُّ الْيَتِيمَ ①

৪। এবং *অভাবীকে খাবার দিতে (অন্যদের) উৎসাহিত করে না।

وَلَا يَحْضُرُ عَلَى طَعَامِ الْمَشْكِينِ ①

৫। অতএব দুর্ভোগ এমন সব নামাযীদের^{৩৪৫} জন্য,

فَوَيْلٌ لِلْمُصَلِّينَ ①

৬। যারা নিজেদের নামায সম্বন্ধে উদাসীন

الَّذِينَ هُمْ عَنْ صَلَاتِهِمْ سَاهُونَ ①

★ ৭। (এবং) যারা কেবল *লোক দেখানো কাজ করে^{৩৪৬}

الَّذِينَ هُمْ يُرَآؤْنَ ①

[৮] ★ ৮। এবং যারা নিত্য দিনের ব্যবহারের সাধারণ^{৩৪৭} জিনিষপত্র থেকে অন্যদের বঞ্চিত রাখে।

وَيَمْنَعُونَ الْمَاعُونَ ①

দেখুন : ক. ১ঃ১ খ. ৮২ঃ১০ গ. ৬৯ঃ৩৫; ৮৯ঃ১৯ ঘ. ৪ঃ১৪৩।

৩৪৩। আল্লাহর বিচারে যার বিশ্বাস নেই অথবা যে ব্যক্তি নৈতিক মূল্যবোধের আসল উৎস ধর্মকেই অস্বীকার করে সে প্রকৃতই হতভাগা।

৩৪৪। এ আয়াত এবং পরবর্তী আয়াত এমন দুটি সামাজিক ব্যাধির কথা বলছে যার প্রতিকার না করলে সমাজের অবক্ষয় ও ভাঙ্গন অবধারিত হয়ে পড়ে। এতীমদের প্রতিপালন ও যত্ন না করলে জাতির আত্মত্যাগের স্পৃহা মরে যায়। দরিদ্র ও ভাগ্যাহতদের প্রতি অবহেলা ও উদাসীনতার দরুণ একটি অবহেলিত শ্রেণীর ধর্মস্পৃহা ও ভাগ্যোন্নয়নের ইচ্ছা তিরোহিত হয়ে যায়। এতে সমাজের অপূরণীয় ক্ষতি হয়।

৩৪৫। 'নামায' আল্লাহর প্রতি মানুষের কর্তব্য ও দায়িত্বের প্রতীক। কিন্তু মুনাফিকদের নামায আত্মাহীন দেহের মত। এরা আল্লাহর সৃষ্ট জীবের প্রতি কোন দায়িত্ব ও কর্তব্য পালন করে না।

৩৪৬। মুনাফিক ও আচার-সর্বস্ব লোকেরা আন্তরিক না হয়ে কেবল লোক দেখানোর জন্য পুণ্য ও দয়া-দাক্ষিণ্যের কাজ করে থাকে।

৩৪৭। 'মা'উন' অর্থ গৃহস্থালীর নিত্য ব্যবহার্য জিনিষপত্র যথা খন্টা, কুড়াল, দা, রান্নার ডেক্-ডেক্‌চি ইত্যাদি, দয়ার কাজ, প্রয়োজনীয় দ্রব্য, 'যাকাত' (আকরাব)। ['ইয়াম নাউন' অর্থ তারা নিজেদেরকে এবং অন্যদেরকে বিরত রাখে। (হযরত খালীফাতুল মসীহ সানী (রা:) প্রণীত তফসীরে সগীর দ্রষ্টব্য)]